



KELUARAN DALAM NEGERI KASAR (KDNK), SUKU TAHUN KETIGA 2024

Prestasi KDNK



KDNK Malaysia
berkembang

5.3%
dengan nilai
RM419.2b

ST2 2024: RM400.7b (5.9%)

Prestasi KDNK Bulanan



Prestasi KDNK Pengeluaran & Perbelanjaan


-Perubahan Peratusan Tahunan (%)




Nota: Prestasi tidak termasuk duti import

Pertumbuhan KDNK Malaysia (%)


Bulanan
(Jan 2021 – Sep 2024)



Suku Tahunan
(ST1 2021 – ST3 2024)



Tahunan
(1996 – 2023)



KDNK Malaysia meningkat 5.3 peratus, disokong oleh pengembangan dalam pelaburan dan perbelanjaan isi rumah

- **Keluaran Dalam Negeri Kasar (KDNK) Malaysia** pada suku tahun ketiga 2024 **bertumbuh 5.3 peratus**, berikutan pengembangan 5.9 peratus pada suku tahun sebelumnya. Seiring dengan itu, KDNK meningkat 1.8 peratus (ST2 2024: 2.9%) dari segi pelarasan musim suku tahun ke suku tahun. Berdasarkan prestasi bulanan, ekonomi Malaysia mencatatkan pertumbuhan kukuh 7.4 peratus pada bulan Julai, seterusnya menyederhana kepada 4.7 peratus pada bulan Ogos dan 4.0 peratus pada bulan September 2024.
- Pertumbuhan ekonomi ini didorong oleh momentum positif dalam semua sektor utama kecuali sektor Perlombongan dan pengkuarian yang merosot pada suku tahun ketiga 2024. Faktor-faktor asas seperti pelaburan pusat data yang semakin berkembang, peningkatan ketara dalam pengimportan barangan modal dan aktiviti pelancongan yang menggalakkan telah memberi kesan positif terhadap pengembangan ekonomi.
- Bagi **tiga suku pertama tahun 2024**, ekonomi Malaysia **meningkat sebanyak 5.2 peratus** (3ST 2023: 3.8%).

KDNK mengikut Kaedah Pengeluaran

- Sektor **Perkhidmatan** berkembang sebanyak 5.2 peratus (ST2 2024: 5.9%) pada suku tahun ketiga 2024. Prestasi ini disokong oleh penyederhanaan dalam Perdagangan borong & runcit pada 4.2 peratus, berikutan pertumbuhan yang lebih perlahan terutamanya dalam Perdagangan runcit (4.0%) dan Kenderaan bermotor (3.5%). Sementara itu, Perdagangan borong menunjukkan peningkatan pada suku tahun ini pada 4.4 peratus. Subsektor Pengangkutan & penyimpanan dan Perkhidmatan perniagaan menunjukkan pertumbuhan yang lebih baik pada suku tahun ini masing-masing pada 10.6 peratus dan 8.5 peratus. Pertumbuhan ini mencerminkan pengembangan dalam segmen penumpang terutamanya dalam pengangkutan darat dan udara serta aktiviti berkaitan perjalanan dan pelancongan, yang menyokong trend menggalakkan dalam aktiviti pelancongan. Bagi pelarasan musim suku tahun ke suku tahun, sektor Perkhidmatan berkembang 1.7 peratus (ST2 2024: 3.3%).
- Sektor **Pembuatan** meningkat 5.6 peratus (ST2 2024: 4.7%) pada suku tahun ini, dipacu oleh pertumbuhan yang lebih baik dalam industri berorientasikan eksport seperti Produk elektrik, elektronik & optikal (5.6%) dan Produk petroleum, kimia, getah & plastik (4.4%). Walau bagaimanapun, industri berorientasikan domestik menyederhana dipengaruhi oleh pertumbuhan perlahan dalam Peralatan pengangkutan, pembuatan lain dan pembaikan berikutan pengeluaran yang lebih rendah dalam kenderaan bermotor & peralatan pengangkutan. Bagi pelarasan musim suku tahun ke suku tahun, sektor Pembuatan meningkat sebanyak 2.0 peratus (ST2 2024: 3.1%).
- Sektor **Pembinaan** merekodkan pertumbuhan kukuh sebanyak 19.9 peratus (ST2 2024: 17.3%), pengembangan terpantas sejak suku tahun kedua 2021. Kesemua segmen menunjukkan pertumbuhan memberangsangkan diterajui oleh Bangunan bukan kediaman (28.1%), diikuti oleh Aktiviti pembinaan pertukangan khas (21.7%), Bangunan kediaman (22.7%) dan Kejuruteraan awam (10.7%). Di samping projek berkaitan pusat data, terdapat projek berskala besar yang sedang dijalankan, khususnya dalam pembinaan jalan raya & landasan kereta api serta utiliti. Bagi pelarasan musim suku tahun ke suku tahun, sektor ini meningkat 5.7 peratus (ST2 2024: 8.7%).

Dikeluarkan oleh: Jabatan Perangkaan Malaysia (DOSM)



@StatsMalaysia



KDNK Malaysia meningkat 5.3 peratus, disokong oleh pengembangan dalam pelaburan dan perbelanjaan isi rumah

- Sektor **Pertanian** berkembang 3.9 peratus (ST2 2024: 7.3%), berikutan pertumbuhan yang lebih perlahan dalam subsektor Kelapa sawit pada 7.3 peratus. Pertanian lain meningkat 1.8 peratus pada suku tahun ini disebabkan oleh peningkatan dalam aktiviti sayur-sayuran dan buah-buahan. Sektor ini mencatatkan pertumbuhan marginal 0.5 peratus (ST2 2024: 1.7%) bagi pelarasan musim suku tahun ke suku tahun.
- Walau bagaimanapun, sektor **Perlombongan & pengkuarian** merosot pada suku tahun ini kepada negatif 3.9 peratus (ST2 2024: 2.7%) dipengaruhi oleh penguncupan dalam subsektor Minyak mentah & kondensat dan Gas asli masing-masing pada -7.3 peratus dan -2.8 peratus. Sektor ini menurun kepada -1.1 peratus (ST2 2024: -4.0%) bagi pelarasan musim suku tahun ke suku tahun.

KDNK mengikut Kaedah Perbelanjaan

- **Penggunaan akhir swasta** atau perbelanjaan isi rumah yang menyumbang 61.7 peratus kepada KDNK, meningkat 4.8 peratus (ST2 2024: 6.0%) pada suku tahun ini. Prestasi ini disokong oleh penggunaan yang lebih tinggi dalam Pengangkutan (13.7%) dan Restoran & hotel (14.2%), manakala penggunaan dalam Makanan dan minuman bukan alkohol menyederhana kepada 3.7 peratus (ST2 2024: 7.2%). Perjalanan ke luar negara meningkat pada suku tahun ini, menunjukkan permintaan yang tinggi dalam pelancongan disokong oleh peningkatan frekuensi penerbangan. Sementara itu, peningkatan pelancong masuk telah mengukuhkan permintaan merentasi pelbagai sektor. Bagi pelarasan musim suku tahun ke suku tahun, prestasi keseluruhan Perbelanjaan penggunaan akhir swasta merosot kepada -0.5 peratus (ST2 2024: 4.5%).
- **Pembentukan modal tetap kasar (PMTK)** atau pelaburan dalam aset tetap terus berkembang kepada 15.3 peratus daripada 11.5 peratus pada suku tahun sebelumnya, mencerminkan peningkatan ketara dalam aktiviti pelaburan khususnya dalam sektor Pembinaan. Kesemua jenis aset mencatatkan pertumbuhan yang memberangsangkan didorong oleh Struktur (18.6%) dan Jentera & peralatan (12.3%), serta Aset Lain (10.7%). PMTK mengikut sektor menunjukkan kedua-dua sektor Awam dan Swasta mencatat pertumbuhan dua digit pada suku tahun ketiga 2024. Bagi pelarasan musim suku tahun ke suku tahun, PMTK meningkat 5.7 peratus (ST2 2024: 5.1%).
- **Perbelanjaan penggunaan akhir kerajaan** berkembang kepada 4.9 peratus (ST2 2024: 3.6%), disumbangkan oleh perbelanjaan ke atas bekalan dan perkhidmatan. Bagi pelarasan musim suku tahun ke suku tahun, Perbelanjaan penggunaan akhir kerajaan meningkat sebanyak 5.1 peratus (ST2 2024: 0.2%) pada suku tahun ini.
- **Import** meningkat lebih tinggi daripada **Eksport** masing-masing kepada 13.5 peratus (ST2 2024: 8.7%) dan 11.8 peratus (ST2 2024: 8.4%). Oleh itu, Eksport bersih menguncup sebanyak 8.8 peratus berbanding peningkatan 3.4 peratus pada suku tahun sebelumnya.
- Secara ringkasnya, ekonomi Malaysia menunjukkan daya tahan walaupun dengan ketidakpastian ekonomi global. Permintaan domestik akan terus menjadi pendorong utama pertumbuhan, disokong oleh faktor-faktor seperti inflasi yang sederhana, prestasi pasaran buruh yang lebih baik dan projek infrastruktur yang berterusan. Selain itu, pelarasan gaji penjawat awam di bawah Sistem Saraan Perkhidmatan Awam (SSPA) baharu pada Disember 2024 dijangka akan merangsang perbelanjaan pengguna pada suku tahun keempat 2024. Menjelang tahun 2025, ekonomi dijangka mengekalkan trajektori positif dengan pengenalan gaji minimum baharu, seterusnya meningkatkan penggunaan domestik dan mengukuhkan kestabilan serta pertumbuhan ekonomi.

Dikeluarkan oleh: **Jabatan Perangkaan Malaysia (DOSM)**



@StatsMalaysia

